

Morning Dogri (NSD) National News Bulletin 28-04-2024

आकाशवाणी

खबरां राजेश मंसोत्रा कोला।

1. लोकसभा चुनां दे त्रिए गेड़ दे मतदान आस्तै जोरें-शोरें कन्नै प्रचार जारी ऐ। सब्बने पार्टिएं दे बड़डे नेता, देश भरै च रोड शो ते रैलियां करा'रदे न।
2. कांग्रेस अध्यक्ष मल्लिकार्जुन खड़गे होरें आक्खेआ ऐ जे उंदी पार्टी 5 न्याय ते 25 गारंटिएं आले वायदे गी पूरा करोग।
3. ईरान नै आक्खेआ ऐ जे भारत दे चालक दल गी राजनायिकें कन्नै मिलने दी इजाजत दित्ती जाग, उनेंगी मनुक्खी आचार पर छोड़ने पर बचार कीता जा'रदा ऐ।
4. बीजेपी नेता ते केन्द्रीय मंत्री पीयूष गोयल होरें प्रधानमंत्री नरेन्द्र मोदी हुंदे आस्सेआ कीते गेदे सब्बने वायदे गी पूरा करले लेई मेहनत कन्नै कम्म करने दी सगंध लैती ऐ।
5. मौसम विभाग नै पच्छिम बंगाल ते ओडिशा च लूह गी लेइयै रैड अलर्ट जारी कीता ऐ।

<><><><><><>

Campaign

लोकसभा चुनां दे त्रिए गेड़ दे मतदान लेई चुनां प्रचार जोरें-शोरें कन्नै जारी ऐ। मुख्य भरै च वरिष्ठ नेता थाहरें थाहरें रैलियां करा'रदे न। इस गेड़ च 10 राज्यें ते 2 केन्द्र शासत प्रदेशें दे 95 पार्लिमानी हल्के च 7 मई गी वोट पाए जाने न। इस गेड़ च कुल 351 मेदवार चुनां मैदान च न।

<><><><><><>

Add Campaign PM

प्रधानमंत्री नरेन्द्र मोदी होर अज्ज ते कल बी कर्नाटक च 5 रैलिंग गी संबोधत करगंन। मोदी होर ओकडे लोकसभा हल्के च प्रचार करा'रदे न जित्थें 7 मई गी मतदान होना ऐ। प्रधानमंत्री होर अज्ज बडलै बेलागावी च इक जनसभा गी संबोधत करा करदे न। एह्दे मगरा ओह् उत्तर-कन्नड़ लोकसभा हल्के च सिरसी जांगन ते दपैहरी इक जनसभा अग्गे भाषण देंगन। एह्दे परैत ओह् देवांगीरी जांगन ते मगरा बेल्लारी च अज्जै दी खीरली रैली गी संजा'लै संबोधत करगंन। मोदी होर कल बागलकोट च बीजेपी मेदवारें लेई इक रैली गी संबोधत करगंन। मोदी होरें गोवा च कल चुनावी रैली गी संबोधत कीता। आंध्रप्रदेश च वाईएसआर कांग्रेस पार्टी अध्यक्ष वाई.एस.जगन मोहन रेड्डी होरें पार्टी दे घोशणा पत्र गी टेडेपल्ली च पार्टी दफतरै च जारी कीता। इस मौके पर बोलदे होई उनें आक्खेआ जे 2019 च पार्टी नै जेह्ड़े वायदे कीते न, उंदे चा 99 फीसद गी पूरा कीता।

<><><><><><>

Amit Shah

अमित शाह होरें गुजरात च पोरबंदर, भरुच ते पंचमहल च चुनावी रैली गी संबोधत कीता। पंचमहल च इक रैली गी संबोधत करदे होई शाह होरें आक्खेआ जे बीजेपी सरकार सत्ता च वापसी पर समान नागरिक संहिता लागू करोग। उनें आक्खेआ जे नरेन्द्र मोदी हुंदी अगुवाई च बीजेपी सरकार नै मुख्य गी आतंकवाद थमां मुक्त बनाया ऐ। उनें आक्खेआ जे बीजेपी दी अगुवाई आली सरकार समाज दे पूरे पराते विकास लेई वचनबद्ध ऐ।

<><><><><><>

Gujrat Campaign

गुजरात च लोकसभा चुना आस्तै प्रचार जोरे-शोरें कन्नै जारी ऐ। बीजेपी दे वरिष्ठ नेता राजनाथ सिंह होरें बीजेपी दे मेदवार दे समर्थन च चुनावी रैलियां करगंन। सिंह होर अज्ज अहमदाबाद च प्रेस कांफ्रेंस गी संबोधत करगंन ते मगरा खामभट ते भावनगर च चुनावी सभा गी बी संबोधत करगंन। तोआई कांग्रेस दे वरिष्ठ नेता अभिषेक मनु सिंघवी होर राज्य च चुनां प्रचार करगंन। सिंघवी होर अहमदाबाद च प्रेस कांफ्रेंस गी संबोधत करगंन। कांग्रेस दे साबका अध्यक्ष राहुल गांधी होर कल पटना च चुनावी रैली गी संबोधत करगंन।

<><><><><><>

UP Rallies

उत्तर प्रदेश च अज्ज केई सारी सियासी रैलियां होआ'रदियां न। बीजेपी दे वरिष्ठ नेता अमित शाह होर कासगंज, मेनपुरी, इटावा ते कानपुर च रैलियां करगंन। ओह कानपुर च लोकसभा चुनाएं दे सिलसिले च पार्टी कार्जकर्ताएं कन्नै बी मलाटी करगंन। बीजेपी दे वरिष्ठ नेता ते मुख्मन्त्री योगी आदित्यनाथ बरेली, बदायू ते एटा जिले च रैलियां करगंन। समाजवादी पार्टी प्रमुख अखिलेश यादव बी बरेली च प्रचार करगंन। उंदा सम्मल जिले च बी सियासी रैली करने दा कार्यक्रम ऐ।



Congress

कांग्रेस दे राष्ट्रीय अध्यक्ष मल्लिकार्जुन खड़गे होरें आकखेआ ऐ जे उंदी पार्टी 5 न्याय ते 25 गारंटिं आले वायदे पूरे करोग। खड़गे होर गुवाहाटी च पत्रकारें गी संबोधत करा'रदे हे। उनें प्रधानमंत्री नरेन्द्र मोदी हुंदे आस्सेआ पिछले 10एं ब'रें च कीते गेदे वायदें गी पूरा करने च नाकाम रौहने लेई नुक्ताचीनी कीती ते बीजेपी सरकार आस्सेआ हर ब'रे 2 करोड़ नौकरियां देने ते करसानें दी आमदनी दूनी करने च नाकाम रौहने दा आरोप लाया।



Iran

ईरान नै आकखेआ ऐ जे भारत दे क्रियू दल गी भारतीय राजनायिकें कन्नै मिलने दी इजाजत दित्ती जाग। ईरान नै इक पुर्तगाली समुंद्री जहाजै पर सुआर भारतीय क्रियू दल गी हिरासत च लैते दा ऐ। ईरान दे विदेश मंत्रालय दे इक ब्यान मूजब इनेंगी मनुक्खी अधिकारें दे आधार पर छोड़ेआ जा'रदा ऐ। वीरवारें भारतीय विदेश मंत्रालय दे प्रवक्ता रंधीर जायसवाल होरें आकखेआ हा जे ईरान च हिरासत च बकाया 16 भारतीयें गी छुड़काने लेई तकनीकी अड़चने गी दूर कीता जा'रदा ऐ। भारतीय अधिकारिणें उनें क्रियू सदस्यें ते उंदे परिवारें कन्नै लगातार संपर्क बनाए दा ऐ।



Piyush Goyal

बीजेपी दे नेता ते केन्द्री मंत्री पीयूष गोयल होरें मुंबई च झुग्गी-झोंपडी पुर्नवास परियोजनाएं गी लागू करने सनें प्रधानमंत्री नरेन्द्र मोदी हुंदे आस्सेआ कीते गेदे सब्बने वायदे गी पूरा करने लेई मेहनत कन्नै कम्म करने दी सगंध लैती। श्री गोयल होरें कल दहीसर मुंबई च चुनां रथ गी झंडी दस्सने मगरा बोला'रदे हे।



Telangana

तेलंगाना च भारतलीय कम्युनिस्ट पार्टी सीपीआई ते भारतीय कम्युनिस्ट पार्टी "मार्क्सवादी सीपीआईएम, दवै कांग्रेस गी समर्थन देआ'रदियां न, तां जे लोकसभा चुनां च बीजेपी गी हराया जाई सकुं सीपीआईएम दे नेताएं कल प्रदेश कांग्रेस कमेटी दे अध्यक्ष ते मुखमंत्री रेवंथ रेड्डी हुंदे कन्नै इस सरबंधै च गल्लबात कीती। दौनें पाटिएं भोंगीर गी छोड़ियै पूरे राज्य च अपने मेदवार परताई लैते न। सिर्फ भोंगीर दी सीट पर सीपीआईएम दा मेदवार खडोते दा ऐ। सीपीआईएम दे नेताएं कन्नै बैठक मगरा रेड्डी होरें दस्सेआ जे उनें कांग्रेस लेई समर्थन मंगेआ ऐ तां जे उंदे वोट बंडोने लेई। कल नामांकन परताने दी खीरी तरीक ऐ ते कल साफ होइ जाग जे सीपीआईएम इस सीटा परा अपना मेदवार परतांदी ऐ जां नेई। एह्दे शा पैहले उपमुखमंत्री भट्टी विक्रमार्क होरें बी कम्युनिस्ट नेताएं गी कांग्रेस दा साथ देने दी अपील कीती ही। सीपीआई ते सीपीआईएम नै बीजेपी गी हटाने आस्तै कांग्रेस गी समर्थन दित्ता ऐ।



IMD

मौसम विभाग नै पच्छिम बंगाल दे गांगेय क्षेत्रें ते ओडिशा च लूह गी लेइयै रैड अलर्ट जारी कीता ऐ। बिहार, झारखंड, रायलसीमा, कर्नाटक, तमिलनाडू, केरल, माहे, कोंकन, उत्तर प्रदेश, तटीय आंध्रप्रदेश ते यनम च अगले 4-5 दिन तगर किश थाहरें पर लूह चलने दा अनुमान जताया ऐ। पच्छमी असम, मेघालय, त्रिपुरा च कल्लै तगर ते केरल, माहे, तटीय कर्नाटक, तटीय आंध्रप्रदेश ते कोकन च पैहली मई तगर उमस आली गर्मी पौने दी पेशगोई कीती ऐ। हिमाचल प्रदेश, उत्तराखंड, जम्मू कश्मीर, गिलगिल, बलित्तस्तान, मुज्जफराबाद च कल तगर बरखा ते ऐन-गड़ा पौने दी पेशगोई कीती ऐ। अगले दो-त्रै दिनें गतर मुख्य दे उत्तर पूर्वी

क्षेत्रें च गरज कन्नै बरखा पौने दी संभावना जताई गई ऐ। दिल्ली च अज्ज आंशिक तौर पर बद्दल छाए दे रौहगन ते तापमान 39 थमां 22 डिग्री सैल्सियस बश्कार बने दा रौहग।

<><><><><><>

IPL

आईपीएल क्रिकेट च अज्ज गुजरात टायटंस दा मकाबला रॉयल चैलेंजर्स बेंगलोर कन्नै अहमदाबाद च होग। एह मैच दपैहरी साढ़े 3 बजे शुरू होग। इक होर मकाबले च चेन्नई सुपर किंग्स ते सनराइजर्स हैदराबाद बश्कार संजा साढ़े 7 बजे थमां चेन्नई च मैच होग। प्रतियोगिता च कल खेड्डे गेदे मैच च राजस्थान रॉयल्स नै लखनऊ सुपर जायंटस गी 7 विकटें कन्नै हराई दित्ता। राजस्थान नै 197 रंजें दा लक्ष्य 3 विकटां मुआइयै हासल करी लैता।

<><><><><><>